

敕修陝西通志

第八
函
十
冊

陝西通志第七十五卷

經籍二

子類

集類

子類

子之類凡十七曰儒家類曰道家類曰法家類曰名家類曰墨家類曰縱橫家類曰農家類曰雜家類曰小說家類曰天文類曰五行類曰蓍龜類曰曆筭類曰兵書類曰雜藝術類曰類事類曰醫書類

按舊志子類有神農黃帝書數種今考神農二十篇劉向謂出於李悝及商君所說皇帝素問陳氏謂出於後世依託其他諸書疑皆偽造者居多茲槩從闕焉

太公二百三十七篇

同呂望撰

後世之言兵及周之陰權皆宗太公爲本謀

史記齊世家

謀八十一篇

言七十一篇兵八十五篇

漢書藝文志

呂望爲周師尚父本有道者或

有近世又以爲太公術者所增加也

藝文志注

李靖曰謀所謂陰謀不

可以言窮言不可以兵窮兵不可以財窮此三門也

李衛公問答

老子

曰將欲翕之必固張之將欲奪之必固與之此陰謀之言也范蠡

用之以取吳張良本之以滅項而言兵者尚焉此太史公入道家

然陰謀之術申商韓非之所本也文王之德之純太公見而知之

丹書敬義之訓武王得於師尚父陰謀傾商之說陋矣

玉海。按此二百三

十七篇出於班史藝文志而隋經籍志不載於六韜外另有太公陰謀及陰符鈴錄等九種考漢藝文志如劉向所序六十七篇注云新序說苑世說列女傳頌圖皆不細標其目疑此或依其例而以陰謀及陰符鈴錄等書括於二百三十七篇之中歟抑彼或多後儒依託歟茲不盡載

六韜六卷

呂望撰

周史六發六篇

漢書藝文志

師古曰卽今之六韜也蓋言取天下及軍

旅之事發字與韜同也

藝文志注

晁氏曰周呂望撰分文武龍虎豹犬

六目兵家權謀之書也元豐中以六韜孫子吳子司馬法黃石公

三畧尉繚子李衛公問對頒行武學令習之號七書

讀書志○康熙中武學

七書祇存孫吳司馬法三種餘俱黜

九章算術

包犧氏始畫八卦作九九之數以合六爻之變黃帝神而明之引而伸之建曆紀協律呂記稱隸首作數其詳未之聞也周公制禮

有九數九章是矣

劉徽九章算經序

老子道德經二卷

李耳撰

晁氏曰李耳撰以周平王四十二年授關尹喜凡五千七百四十

有八言八十一章言道德之旨予嘗學焉通其大旨而悲之蓋不

幸居亂世憂懼者所爲之書乎不然何求全之甚也

讀書志

關尹子九卷

尹喜撰

陳氏曰周關令尹喜蓋與老子同時故老子著書言道德者按漢

志有關尹子九卷而隋唐及國史志皆不著錄意其書亡久矣徐
藏子禮得之於永嘉孫定首載劉向校定序末有葛洪後序未知
孫定從何傳授殆皆依託也序亦不類向文文獻通考○按抱朴子老子西遊遇關令尹喜於散關彊令之著書耳不得已為著道德二經散關在今鳳翔縣南皇甫士安高士傳云平王東遷關以捍移人以職徙尹喜侯氣非此而往遲由茲焉今鳳翔志有授經臺在縣南尹喜既見老子授五千言退而書道德經後常居此合之抱朴子似非無據
葛志但列關尹子而不及道德經故今並列焉

神妙行軍法一卷

陣圖一卷

秦將軍郿人白起撰

白起者郿人也善用兵事秦王封武安君

史記本傳

商子五卷

商君公孫鞅撰

晁氏曰秦公孫鞅撰鞅衛之庶孽好刑名之學秦孝公委以政遂
致富強後以反誅鞅封於商故以名其書本二十九篇今亡者三
篇太史公既論鞅刻薄少恩又讀開塞書謂與其行事相類卒受

惡名有以也

讀書志

明世論十五篇

漢車騎從事杜陵杜篤撰

太史公萬歲曆一卷

萬歲曆祠二卷

俱太史令龍門司馬談撰

太史公素王妙論二卷

太史令龍門司馬遷撰

太史公素王妙論曰諸稱富者非貴其身得志也乃貴恩覆子孫

澤及鄉里也黃帝設五法布之天下用之無窮蓋世有能知者莫

不尊親如范子可謂曉之矣管子設輕重九府行伊尹之術則桓

公以霸范蠡行十術之計二十一年之間三致千萬再散與貧七

畧云司馬遷撰史記正義云二卷今僅見此語於太平御覽

玉海

新序十卷

漢宗室光祿大夫劉向撰

漢劉向撰成帝時典校秘書因採載戰國秦漢間事爲三十卷上

之其二十卷今亡

崇文總目

漢興六藝皆得於散絕之餘世無復明先

王之道以一之者諸儒苟見傳記百家之言皆悅而向之故先王之道爲衆說之所蔽闇而不明鬱而不發而怪竒可喜之論各師異見皆自名家向之序此書於今最爲近古雖不能無失然遠自舜禹而次及周秦以來之嘉言善行亦往往而在也要在慎取之而已

本書曾
鞏序

說苑二十篇

劉向
撰

劉向所序說苑二十篇崇文總目云今存者五卷臣從士大夫間得之者十有五篇與舊爲二十篇正其脫謬疑者闕之

本書
原序

九章重差一卷

說老子四篇

俱劉
向撰

三統曆一卷

漢宗室侍
中劉歆撰

劉氏三統曆譜考步日月五星之度有意其推本之也

漢書列
傳贊

女誡一卷

扶風曹世叔
妻班昭撰

序曰鄙人愚暗受性不敏蒙先君之餘寵賴母師之典訓年十有四執箕箒於曹氏於今四十餘載矣戰戰兢兢常懼黜辱以增父母之羞益中外之累夙夜劬心勤不告勞而今而後乃知免耳吾性疏頑教道無素恒恐子穀負辱清朝聖恩橫加猥賜金紫實非鄙人庶幾所望也男能自謀矣但傷諸女方當適人而不漸訓誨不聞婦禮懼失容他門取耻宗族閒作女誠七章願諸女各寫一通庶有補益裨助汝身去矣其勗勉之

本書原序

元測一卷

扶風馬融撰

老子二卷

長陵三老母卬望之注

老子指趣三卷

母卬望之撰

禦寇論

太常長陵趙岐撰

延熹九年匈奴烏桓鮮卑反叛公卿舉岐擢拜并州刺史岐欲奏守邊之策未及上會坐黨事免因撰次以爲禦寇論

後漢書本傳

釋問七篇

三國蜀漢中陳述撰

杜氏體論四卷

魏幽州刺史京兆杜恕撰

杜氏曰以爲人論之大綱莫重於君臣立身之基本莫大於言行

安上理民莫精於理治勝殘去殺莫善於用兵夫禮也者萬物之

體也萬物皆得其體無有不善故謂之體論

杜氏新書

恕又著興性論

一篇蓋興於爲已

魏志本傳

梁有篤論四卷杜恕撰亡

隋書經籍志

老子訓註

大司農關中董遇撰

遇善治老子

魏畧

善文五十卷

甄正論三卷

俱晉征南將軍杜陵杜預撰

典林二十三卷

京兆韋謏著

故善著述伏林三千餘言演爲典林二十三篇述作及集記凡收

萬言皆深博有才義

晉書本傳

傅子一百二十卷

司隸校尉泥陽傅元撰

元撰論經國九流及三史故事評斷得失各爲區別名爲傅子爲
內外中篇凡有四部六錄合百四十首數十萬言行於世元初作
內篇成子咸以示司空王沉沉與元書曰省足下所著書言富理
濟經綸政體存重儒教足以塞楊墨之流遁齊孫孟於往代每開
卷未嘗不嘆息也

晉書本傳

今存二十三篇餘皆缺

書目

泥汨經三十卷

新豐沙門智猛天竺沙門曇摩羅識等譯

晉元熙中新豐沙門智猛策杖西行到華氏城得泥汨經及僧祇
律東至高昌譯泥汨爲二十卷後有天竺沙門曇摩羅識復齋胡
本來至西河沮渠蒙遜遣使至高昌取猛本欲相叅驗未還而蒙
遜破滅姚萇弘始十年猛本始至長安譯爲三十卷

隋書經籍志

符子二十卷

員外散騎侍郎長安符朗撰

苻朗字元達堅之從兄子也耽玩經籍手不釋卷每談虛語元不覺日之將夕著苻子數十篇行於世亦老莊之流也

晉書苻朗載記

實相論二卷

姚秦國師沙門鳩摩羅什撰

姚興迎羅什待以國師之禮羅什雅好大乘志在敷演常歎曰吾若著筆作大乘阿毗曇非迦旃子比也今深識者既寡將何所論惟爲姚興著實相論二卷興奉之若神

晉書本傳

金剛般若經一卷

鳩摩羅什譯

晁氏曰後秦僧鳩摩羅什譯唐僧宗密僧知恩宋思元仁賈昌朝王安石五家注子弟公愬日誦三過子靳之曰汝亦頗知其義乎對曰知之其義明萬物皆空故古人謂以空爲宗也子曰金剛者堅固不壞之義也萬物之空何以謂之金剛復曰六如偈其言明甚獨奈何因語之曰汝之過正在以有爲法同無爲法以真空同

頑空耳張湛曰身與萬物同有其有
不有心與太虛同無其無

無庶幾如此哉

讀書志

妙法蓮花經觀世音普門品

鳩摩羅什譯

余自少讀普門品雖未能深解其意然嘗以意測之曰此佛氏之

寓言也昔唐李文公問藥山禪師曰如何是惡風吹船飄落鬼國

師曰李翱小子問此何爲文公拂然怒形於色師笑曰發此瞋恚

心便是黑風吹船飄入鬼國也吁藥山可謂啟發人矣以是推之

則知利慾熾然卽是火坑貪愛沉溺便是苦海一念清淨烈焰成

池一念警覺船到彼岸災患纏縛隨處而安我無畏怖如械自脫

惡人侵凌待以橫逆我無忿嫉如獸自奔讀是經者則知補陀大

士真實爲人非浪語者

西山真氏跋

老子二卷

鳩摩羅什注

肇論四卷

姚秦僧
洪肇撰

晁氏曰姚秦僧洪肇撰師羅什規模莊周之言以著此書物不遷

不真空涅槃無知般若無名四論傳燈云肇後爲姚興所殺

讀書志

覺論二十卷

陳扶風
馬樞撰

樞字要理博極經史尤善佛經及周易老子義撰道覺論二十卷

行於世

陳書
本傳

象經一卷

周武帝撰

佛性論

七經論

俱尚書武
功蘇綽撰

綽字令綽少好學博覽群書尤善算術著佛性論七經論行於世

周書
本傳

祖新撰兵書三十卷

十經一卷

四海類聚單方十六卷

俱煬帝
御撰

相經三十卷

丞相長安來和撰

象經一卷

三十六科鬼神感應等大義九卷

俱國子祭酒西城何妥撰

欽器圖三卷

地動銅儀經一卷

九宮五墓一卷

遁甲錄十卷

遁甲立成法一卷

陽遁甲用局法一卷

元辰經十卷

元辰厄百九卷

百怪書十八卷

錄命書二十卷

九宮龜經一百一十卷

太一式經三十卷

孔子馬頭易卜書一卷

風角鳥情二卷

俱儀同京兆臨孝恭撰

序志一卷

唐太宗御撰

唐金鏡書

一作述

一卷

太宗御撰

貞觀二年正月庚午著金鏡述以示侍臣

實錄

爰述金鏡窮神盡聖

便物以言應言以行苞括治體抑揚辭令

張蘊古大寶箴

太宗思隋氏失

道皇運開基因而序之以明誠謹神筆書石命工刻之以賜皇太

子末云明鏡不遠於焉自鑒

太平御覽

帝範四卷

太宗御撰

序曰汝以幼年偏鍾慈愛義方多闕庭訓有乖擢自維城之居屬以少年之位未辨君臣之禮節不知稼穡之艱難余每思此爲憂今自軒昊以降迄於周隋經天緯地之君續業承基之主興亡治亂其道煥然所以披鏡前蹤博採史籍聚其要言以爲近誠云爾

文苑英華

晁氏曰貞觀末著此書以示高宗且曰修身治國備載其中

其末頗以泰侈自咎戒高宗俾勿效已

讀書志

二帝三藏聖教序一卷

太宗高宗

唐書藝文志

唐天訓四卷

高宗御撰

顯慶二年六月上製元首前星維城股肱誠次著股肱論令許敬

宗等注釋名曰天訓

會要

麟閣詞英六十卷

高宗勅撰

臣範

唐藝文志作軌

二卷

則天武皇后撰

天后臣範序云想周朝之十亂爰著十章思殷室之兩臣分爲兩

卷

文苑英華

晁氏曰唐則天皇后武氏撰範或作軌武氏稱制時嘗詔

天下學者習之尋廢本十篇今缺其下五篇

讀書志

紫樞要錄十卷

百僚新誠五卷

青宮紀要三十卷

少陽政範三十卷

列藩正論三十卷

維城典訓二十卷

俱武后撰

訓紀雜載十卷

武后撰

采青宮紀要維城典訓古今內範內範要略等書為雜載云唐書藝文志

開元訓誠元宗御撰

開元二十五年八月甲子帝制訓誠六篇以示諸王其旨蓋明君

臣父子之義齋祭稼穡之事忠王璵等上表請宣付史館及示百

僚許之宰臣奏聖謨垂訓輝映千古望宣布中外手詔諭曰周公

誠伯禽曰無以魯國驕人朕方聖雖慙豈忘誠子聊示庭訓何足

宣布玉海開元御集誠子書一卷唐書藝文志○按此訓誠即御集誠子書也

明皇老子注二卷疏一卷元宗御撰

自製序曰朕承寡薄常感斯文恐失無為之理每因清宴輒扣元

關隨意所得遂為箋註豈成一家之說但備遺闕之文文苑英華晁氏

曰唐元宗撰天寶中加號元通道德經世不稱焉又頗增其辭如